



Urkunden-Sammlung zur Geschichte der auswärtigen Verhältnisse der Mark Brandenburg und ihrer Regenten

...

namentlich in Beziehung auf Anhalt, Bayern, Böhmen, ... und andere
Länder ; [Urkunden-Sammlung für die Geschichte der auswärtigen
Verhältnisse]

Riedel, Adolph Friedrich

Berlin, 1858

2272. Markgraf Ludwig belehnt Albrecht und Johann, Herren von
Mecklenburg, mit dem Lande Stargard und andern Märkischen Lehnen,
am 24. September 1329.

Nutzungsbedingungen

[urn:nbn:de:hbz:466:1-56621](https://nbn-resolving.org/urn:nbn:de:hbz:466:1-56621)

2272. Markgraf Ludwig befehlt Albrecht und Johann, Herren von Mecklenburg, mit dem Lande Stargard und andern Märkiſchen Lehnen, am 24. September 1329.

In Godis namen, amen. Wy Lodewich, van Godis gnade Marcgreve tu Brandenborch unde tu Luſitz, Palanzgreve des Rines, Hertoch to Beyeren, des hilghen Römefchen rikes överſte kemerer, bekennen in desme openen brieve, dat wy den edlen Albrecht unde Johan, brüderen, herren tu Meckelenborch, uſen lieven ömen, mit ſamender hant unde eren rechten erven hebben geleghen unde lien in deſſen jeghenwerdighen brieve tu rechteme herenlene dat lant tu Stargarde mit aller herſcap, mit mannen, mit ſloten, mit all den ſteden unde ſcheiden, die dar tu hören, Lichen mit der heide unde mit den ſcheden, die Eldeneborch mit der Thure unde mit der ſchede, Weſenberghe, huſe unde ſtadt, mit der Lice unde mit der ſchede, unde alle dat binnen der ſchede lit, dat van rechte dar tu höret, Arnberghe mit dem ſtedeken unde mit deme Nyendörpe, mit der ſchede, die tu deme dörpe hört, unde Strelitz, huſe unde dörpp, mit der Pare, unde mit der ſchede des dörpes unde der Pare, deſſe lant mit eren ſcheden, alſo vör gefreven is, unde alle die flote tu hebbende unde tu beſittende mit aller herſcap, mit aller nut, mit allen eren, mit aller vriheit, unde mit alleme rechte, alſe ſie uſer öme vater, deme God ghenedich ſi, hadde. Ock hebbe wi en ghelegghen mit ſamender hant unde eren rechten erven to rechteme lene twe hundert ſtücke gheldes mit alleme rechte in der voghedie to Jagow uppe huven, mer die beede ſchal ſtan uppe Greven Ghünter van Lyndowe unde Greven Hinrik van Zwerin. Hir vöre dat wy unſen ömen unde eren erven laten unde gelegghen hebben Strelitze unde Arnsbergh, als hir vör ſcreven is, ſo hebben ſi us wedder laten Meyenborch, huſe unde ſtat, mit der manſcap unde mit der ghülde, mit der ſchede, unde hebben us los ghelathen der vier duſent mark ſilvers unde des ſchaden van vier jaren, de dar up geghan was, dar en die ſilve Meyenborch vöre ſtunt. Wi ſcölen en ock weſen ein recht ghewere al des vörbenummedden ghuedes, wor en des not is, als et recht is. Unde dat wi unde uſe nakomelinghe al dat hir vör ſcreven ſteit ſtede unde ganz holden, dar hebbe wi uſen ömen deſſen brieff över ghegheven, beſeghelt mit uſeme ingheſeghel. Hir is över ghewefen die erfame man Biſchop Thiderik van Havelbergh, die eddelen Günther unde Alleſ, Greven tu Lindowe, Hinrik van Stegheliz, Albrecht van Klepizk, Hinrik van Sidowe, Herman van Loſſowe, Herman van Reder, Betko van Wiltbergh, Betko van Holdſtendörpp, Herman unde Erik van Wlkowe, Dobeſlawe van Ekſtede, Hinrik van Bellin, Henningh unde Hinrik Schadebak, uſe riddere, Hermannus van Luchowe, unde ander vrome lüde, den man wol loven mach. Dit is gheſchen tu Wiſtock, unde deſſe brief is ghegheven bi der Görneſchen brügge, na der bort Godis duſent jar, drihundert jar, neghenuntwintich jar, des ſünendaghes vör ſente Michiles daghe.